

Pravo na vaučere

OHR želi da objavi da je konačno razjašnjeno pitanje ko ima pravo na koju kategoriju vaučera (certifikata, kupona, potraživanja) u procesu privatizacije u Bosni i Hercegovini. S tim je otklonjena još jedna od velikih prepreka kojima se odragao proces privatizacije.

Eksperti OHR-a su na zahtjev organa nadležnih za privatizaciju i vlada oba entiteta, kao i međunarodnih organizacija uključenih u proces privatizacije, izradili dokument koji sadrži odgovor na ovo pitanje. Ovaj dokument predstavlja sintezu zahtjeva i koncepcija iznesenih na brojnim sastancima sa lokalnim nadležnim organima i međunarodnim organizacijama koji su održani tokom proteklih nekoliko mjeseci.

U dokumentu naslovljenom "Pravo na vaučere" uzimaju se u obzir razlike u entitetskim zakonima o privatizaciji u pogledu dodjele vaučera, ali se osigurava poštivanje osnovnih principa datih u *Državnom okvirnom zakonu o privatizaciji preduzeća i banaka*, koji je stupio na snagu 22. jula 1998. godine. Njime se posebno štite prava izbjeglica i raseljenih lica kako ne bi došlo do njihovog izostavljanja iz procesa privatizacije.

OHR pozdravlja duh saradnje i spremnosti na kompromise koji su pokazali organi nadležni za privatizaciju i vlade dva entiteta u cilju nalaženja rješenja. OHR očekuje od nadležnih organa da poštuju pravila data u ovom dokumentu, da tamo gdje je to potrebno izvrše izmjenu i dopunu entitetskih zakona o privatizaciji, te da uspostave međuentitetske mehanizme kako bi se osiguralo da se podjela vaučera izvrši na nediskriminoran način i da ne dođe do zloupotreba sistema.